

LA USC DI LADINS - VENERDI' 26 GIUGNO 2020

NOMINES

Matteo Ploner tel Consei de l'Istitut Cultural Ladin

*Dozent de economia a
l'Università de Trent, l'era
jà stat tel CdA de l'ICL
dal 2014 al 2019 e l'è stat
nominà da dut l'Consej
general a una*

En mèrtesc sera ai 23 de jujn l'Consej general se à binà en videoconferenza chiamà ite con prozedura de prescia per nominèr l'raprezentant de la mendranza tel Consej de Amministrazion de l'Istitut Cultural Ladin Majon di Fascegn.

Cesare Bernard a inom del grop de mendranza UAL à recordà che la nomina é domanèda per serèr sù na locia che se aea avert acà dotrei meisc, canche l'raprezentant de la mendranza del Comun general Andrea Rizzi aea dat la demiscions, ensema con cheles de la componenta de la Comiscion Culturala Lodovica Dioli desche raprezentanta tel CdA.

Bernard se à dit endespiajà de aer cognù renunzièr al contribut che Rizzi aea portà inant con competenza e l'è dit che da chel moment de contrast duc à perdù vèlch e l'è da se fèr na riflescion sun chest. L'è dit che l'è de besegn de

jent con idees, competenzes e vijion e aldò de chest l'è portà dant la proponeta de nominèr Matteo Ploner, che l'è n curriculum de gran prestije.

Ploner, de naa da Dèlba e enciasà a Trent, l'è professor sozià te la facultà de economia de l'Università de Trent e l'era jà stat tel CdA de l'Istitut te la legislatura passèda, dal 2014 al 2019, con nomina regionèla che no era stata ampò confermèda de mè del 2019.

Bernard se à augurà che Ploner aesse l met de portèr dant so contribut ascort e percacent te chest moment de la vita de l'istitut e che ence la Comiscion Culturala vegne scutèda e tutta en conscidrazion.

Ence l portausc de l'auter grop de mendranza del Consej general, Maurizio Deville, à sostegnù chesta candidatura conscidrèda segur positiva per l'Istitut e dapò dut l'Consej à lità a una.

Augures de bon lurier ge é stac palesé al nef component del CdA Matteo Ploner da man de la procuradora Elena Testor, del president del Consej general Francesco Pitscheider e de la conseiera de procura e presidenta de l'Istitut Ladin Lara Battisti, che se à ampò lamentà che Bernard aesse volù portèr te Consej general la costions de l'Istitut, che cognessa restèr fora da intromiscions politiches.

Bernard à rebadi che sie intervent era stat deldut chiet e che el no à cusà nesciugn, ma ajache se trata de nomines fates dal Consej general, te chest organism se pel n rejonèr.

Ence l conseier provinzièl e regionèl Luca Guglielmi à portà dant si augures de bon lurier a Ploner, recordan che i é stac ence ensema tel CdA e l se à dit spervajo che l posse dassen dèr n contribut positif da l'Istitut Cultural Ladin. 16



Matteo Ploner, nef component del CdA de l'Istitut Cultural Ladin.